

SURA TARIK

Neka je apsolutna hvala Allahu, Tvorcu i Gospodaru svemira, Onome ko je savršenim učinio kosmičke zakone, i neka je neizmjeran salavat i selam na Njegova Miljenika koji nam je pojasnio sve ono što nam je nejasno bilo i koji nam je bio savršenim uzorom kako treba robovati i živjeti da bi se steklo Allahovo zadovoljstvo.

Danas govorimo o suri Tarik. To je mekkanska sura u cijelosti. Objavljena je poslije sure Beled. Ima šesnaest (16) ili sedamnaest ajeta, šezdeset i jednu riječ (61) i dvjesto trideset i devet slova (239).

Cilj ove sure, a Allah najbolje zna, je da se ukaže na slavu Kur'ana, na njegovu istinitost, kada govori o vjernicima i nevjernicima i Kijametskom danu i kada će se sve što je skrivveno otkriti i svaka tajna izaći na vidjelo.

Bismillahi – veličanstveno ime kojim, kada hoće uzdići i počastiti svoga roba, omogućiti mu da Ga spozna, okiti ga svojim blagodatima i izdvoji ga raznim počastima, pa ga zaštititi od grijeha i preuzme na Sebe upravljanje njegovim postupcima. Usmrti ga kao vjenika i proživi ga u Džennetu. Počasti ga svojim zadovoljstvom i upotpuni mu blagodat tako što mu omogućiti da Ga vidi.

Onaj ko ima savršenstvo.

Errahim – koji je svojim blagodatima obuhvatio sva stvorenja.

Errahim – koji je svoje evlije počastio svojom podrškom i pokazao im Svoju plemenitost, darežljivost, blagodati i dobročinstva.

Pošto je na kraju sure Burudž, Allah ukazao na to da je Kur'an sačuvan u Levhi mahfuzu jer Onaj ko ga objavljuje, u cijelosti, zna i poznaje sva stvorenja, obavještava nas da iz tog razloga će sva stvorenja, i nevjernici i vjernici, biti obaviješteni o svojim djelima i svi će biti isplaćeni shodno svojoj zasluži. To će biti na Dan kada će svaka istina biti objelodanjena kao što će biti i sa svakom laži. Bit će prekinute bilo kakve veze. Svima onima koji negiraju taj Dan, Allah se kune, pa kaže:

Tako mi neba i Danice! (Sura Tarik, 1.) – Onog neba koje je ispunjeno zvijezdama i sazviježdima kojima se čuva Slavni Kur'an od otpadnika džina, a taj Kur'an čuva pravi put.

Ova zakletva se odnosi na zemlji najbliže nebo, a ne više nebeske sfere. Ovo nebo u kojem postoji i dan i noć, čiji krug je tristo šezdeset stepeni i koje se niti smanjuje niti povećava.

Allah često spominje nebesa, zvijezde, sunce i mjesec i kune se njima jer su ove stvari kroz svoje promjene i stanja veličanstvene i privlače našu pažnju.

Ne bismo trebali zanemariti ni činjenicu da u ovoj, kao i svim ostalim zakletvama ima nešto što je skriveno, pa kada kaže: - Tako mi neba! – kao da nam kaže: Tako mi Tvorca i Upravitelja nebom!

I zvijezde Danice! – Postoji tumačenje i da je to pulsar. Pulsari su neutronske zvijezde koje brzo rotiraju. Prečnika su do trideset kilometara. Najbrži pulsari se obrnu oko sebe za tri milisekunde. Ispuštaju jaka magnetna zračenja i uski snop radio talasa. Prvi put su otkriveni 1967. godine. Dali su im skraćenicu LGM (little green men – mali zeleni ljudi) jer se mislilo da radio talasi koji su dolazili u jednakim intervalima 1,33 sec. dolaze od vanzemaljske civilizacije. Postoje tri vrste pulsara; pogonjeni rotacijom, gdje se energija zračenja crpi iz rotacije, X-zračni pulsari koji energiju crpe iz svog binarnog partnera, obično je to Crveni džin (div). Zvijezde, kada potroše zalihe vodonika i počnu trošiti helij, prelaze u fazu Crvenog džina. Tada se zvijezde višestruko šire. Pretpostavlja se da će sunce potrošiti svoje zalihe vodonika za pet milijardi godina. Tada će se njegova površina povećati do samog ruba zemljine orbite. Kada se dovoljno raširi, neutronska zvijezda počinje da „krade“ njegovu energiju i gas koji pada na nju joj daje ubrzanje rotacije. Kada izgubi svoje spoljašnje slojeve Crveni džin postaje Bijeli patuljak.

Treća vrsta pulsara su magnetari-oni crpe energiju iz opadajućeg jakog magnetnog polja. Kažu da su pulsari izuzetne gustine. Jedna kašika pulsara bi težila četiri milijarde tona.

Najpoznatiji pulsar je onaj iz Rakove magline.

Tarik, pored ova dva značenja, može imati i značenje svega što se pojavljuje noću. Može imati i značenje Crne rupe, kao i komete jer ona probija. Većina smatra da je to ona zvijezda pomoću koje se ljudi upravljaju na svojim putovanjima, danju i noću.

Zatim Allah postavlja pitanje:

A znaš li ti šta je Danica? (Sura Tarik, 2.) – Ti, Naše najčasnije stvorenje, koliko god se trudio da to dokučiš, nećeš moći ako ti Mi ne kažemo.

Gdje god Allah upotrebljava izraz *ve ma edrake* spoznaja je moguća, a gdje upotrebljava izraz *ve ma judrike* to se nikada neće saznati.

Zvijezda blistava! (Sura Tarik, 3.) – Zvijezda prodorna. Allah nam daje samo općenito tumačenje ovog pojma kako bi nas usmjerio gdje da tražimo. Daleka zvijezda koja svojom svjetlošću para tamu. Ili probija šejtane kada pokušavaju da prisluškuju.

Tarik možemo tumačiti i tako da kažemo da je to ono što kuca na Muhammedovo srce od mnogih blagodat i posebnih tumačenja.

Postoji i tumačenje da je ljudska duša (ruh) – nebo, a da je svijetla zvijezda i prodorna, njegov razum (akl). U jednom ajetu se kaže: - A oni pomoću zvijezde put nalaze.

Nakon spomena zaštićenosti Kur'ana od promjena i umetanja, i nakon što je rečeno da se i čovjek čuva i da se motri na njega, navodi i čuvanje nefsova (života) u kojima postoji sposobnost za čuvanje Kur'ana u prsima. On kaže:

Nema čovjeka nad kojim neko ne bdije. (Sura Tarik, 4.) – Uistinu svaki nefis- čovjek, život, naročito čovjek zbog njegove izuzetnosti i zbog osobenosti njegova nefsa kome nema sličnog, ima čuvara, pouzdanog pratioca koji ga ne napušta ni za jedan trenutak. Odnosi se na posebnu kategoriju meleka. Jedni meleki ga čuvaju od nedaća, jedni ga čuvaju od zlomisli, jedni da bi ubilježili njegova djela, a jedni da bi vodili računa o tome da nađe ono što mu je propisano od opskrbe, smrti, hoda i puta, sreće ili nesreće, braka i sličnog. To ništa ne utiče na izjavu: Mi smo dodijeli i Mi smo odredili.

Ako kažeš: - Čuvar je melek, - u pravu si, a ako kažeš: - Čuvar je Allah. – u pravu si. Allah je taj koji im je naredio da prate i čuvaju i On im zabranjuje da to zanemare. On je istinski i stvarni Čuvar.

Poslanik rekao je: *Za svakog vjernika je zaduženo stotinu šezdeset meleka (160) koji ga štite od svega onog što mu nije određeno. U to spada i vid. Sedam meleka ga štiti kao što se tanjir meda štiti od muha. Kada bi rob bio prepušten sebi koliko za treptaj oka, šejtani bi ga šćepali.*

Allah je istinski Čuvar i On motri i zna svaki naš postupak. Bilježi se da je Ibn Omer naišao na nekog čobanina i rekao mu: - Prodaj mi ovcu. – Momak je rekao: - Ovce nisu moje. – Ibn Omer mu je rekao: - Reci gazdi da ju je pojeo vuk. – Momak mu reče: - A gdje je Allah? – Ibn Omer je, poslije toga, otišao njegovom gazdi i od njega kupio i momka i ovce. Oslobodio je roba i poklonio mu stado. Često je, poslije, govorio: - I reče taj rob: - A gdje je Allah?

Čovjek je čuvar ako čuva svoje udove i svoje srce, čuva svoju vjeru od napada i izljeva srdžbe, slasti prohtjeva, nefsanskih varki i šejtanskog zavođenja.

Onaj ko napiše ime *Hafiz* (الحفيظ) pa ga okači na sebe, ili ga puno izgovara, kada bi zanoćio i sa zvijerima, ne bi mu mogle nauditi.

Pošto početak ukazuje i na kraj: Sve što ima svoj početak ima i svoj kraj, - Allah nas vraća na početak i razmišljanje o početku, ukazom:

Nek čovjek pogleda od čega je stvoren! (Sura Tarik, 5.) – Onaj ko ga je stvorio, definitivno može i da ga proživi.

Nakon pitanja kojim je ukazao čovjeku na činjenicu da je razmišljanje o tome jako bitna stvar i da mu to može priskrbiti trajnu sreću, a čovjek se ne može riješiti onoga što odvodi od toga, Allah mu odgovara, pa kaže:

Stvoren je od tekućine koja se izbacila, (Sura Tarik, 6.) – Čovjek je stvoren na najlakši način, nakon što je praotac Adem stvoren od zemlje i pramajka Hava stvorena od njegova rebra. Stvoren je od tekućine koja se izbacila. Nije rekao od dvije tekućine, jer se one sjedinjuju u materici.

Pošto se želi ukazati i na mušku i na žensku tekućinu, Allah kaže:

koja između kičme i grudi izlazi, (Sura Tarik, 7.) – Ona izlazi iz kičme čovjeka i prsa žene. Iz ovoga vidimo da je strast muškarca iza, a strast žene ispred. Izvor muške strasti su leđa a ženske prsa.

Pošto je ukazao na činjenicu da prati svako živo biće, na to kako i od čega je čovjek stvoren i na Svemoć koja je čovjeka kreirala iz te tekućine, Allah opovrgava sve argumente onih koji negiraju ponovno stvaranje i porživljenje, pa kaže:

i On je, zaista, kadar da ga ponovo stvori (Sura Tarik, 8.) – da ga ponovno vrati. Može ga povratiti u njegovo stanje u kojem je i bio. Može ga povratiti stopu po stopu iz starosti u fazu kada je bio u kičmi svoga oca, a kamoli ga proživjeti.

U jednom hadisu stoji da u čovjeku postoji jedan dio koji je neuništiv. To je donji dio kičmenog stuba, repnjača. Savremeni učenjaci kažu da je tu sadržan genetski zapis svakog čovjeka i da će iz njega biti proživljen svaki čovjek. Savremena genetika tvrdi da je, teoretski, moguće iz DNA povratiti izumrle životinje. Ako je to moguće čovjeku, zašto odbijaju priznati Allahu.

Ponovno proživljenje i vraćanje je:

onoga Dana kada budu ispitivane savjesti, (Sura Tarik, 9.) – na Dan kada se otkriju sve tajne – sve ono što prsa kriju, od namjere i uvjerenja i svega ostalog. Tada će se jasno odvojiti pozitivno od negativnog i dobro od hrđavog i svako će dobiti spram svoje zasluge.

Ibn Omer kaže: - Allah će, na Kijametskom danu, otkriti svaku tajnu, pa će neka lica biti ukrašena i vesela, a neka nagrđena. Ko bude sproveo emanet, njegovo lice će biti radosno, u protivnom tamno.

Poslanik rekao je: *Allah je obezbijedio svojim stvorenjima četiri stvari; namaz, zekat, post ramazana i kupanje poslije džunupluka. To su tajne za koje Allah kaže: Onoga dana kada tajne budu iznesene na vidjelo.*

Pošto čovjek nastoji zaštititi svoje tajne, naročito one koje bi mogle naškoditi njegovom ugledu, Allah kaže:

kada čovjek ni snage ni branioca neće imati. (Sura Tarik, 10.) – tada neće imati nikakvog uticaja niti će imati zaštitnika ili pomagača. Niti će moći da se brani, niti će neko moći da spriječi provedbu odredbe nad njim.

Pošto je ovako kratkim rečenicama potvrdio da je Kur'an Njegova riječ, da će Proživljenje biti i da je sve istina, bez obzira na njihovo opiranje, to je uzrokovalo i zakletvu u istinitost Riječi, pa kaže:

I tako mi neba puna kiše (Sura Tarik, 11.) – Tako mi neba koje se povraća – koje vraća svoje prijašnje stanje, obnavlja dan i noć, sunce i mjesec i godišnja doba.

Pošto je naveo gornji sloj, zbog njegove odlikovanosti, to prati navođenjem donjih slojeva, pa kaže:

i Zemlje koja se otvara kada rastinje nikne, (Sura Tarik, 12.) – i tako mi zemlje koja je vaše boravište i na koju ste svikli i koja vam je bliska – koja se otvara pred biljem i izvorima. Kako god se zemlja otvara pred biljem koje je bilo mrtvo i svehlo da ponovno nikne i da ploda, isto tako će se otvoriti kako bi ljudi iz nje izašli i proživljeni bili.

Ovom zakletvom Allah prethodi onom radi čega se kune, pa kaže:

Kur'an je, doista, govor koji rastavlja istinu od neistine, (Sura Tarik, 13.) – koji iznosi sve ove vijesti, a rečeno je da je on slavan, da je u Levhi mahfuzu i da ga nevjernici poriču, neporeciv.

lakrdija nikakva on nije! (Sura Tarik, 14.) – A nipošto nije, ni svojim vidljivim a ni skrivenim značenjima – beznačajan. Ko god ga čuje, čita, proučava, osjeća strahopoštovanje spram njega.

Poslije ovoga, Allah navodi ustrajnost nevjernika u negiranju Kur'ana, pa kaže:

Oni se služe spletkama, (Sura Tarik, 15.) – oni stalno spletkare, želeći da ga ospore.

a Ja ih uništavam - (Sura Tarik, 16.) – a Ja im to dozvoljavam, kako bi ih kaznio odakle se i ne nadaju.

Pošto je ovim ajetom ukazao na to da su oni beznačajni, izriče im jasnu prijetnju pa kaže:

zato nevjernicima još vremena dadni, još koji trenutak ih ostavi. (Sura Tarik, 17.) – pusti ti nevjernike, daj im vremena, nemoj ih proklinjati. Mi ne žurimo da ih kaznimo. S kaznom požuruju samo oni koji se boje da bi im zlikovci mogli umaći. I Ja ću im pustiti još zakratko, ma koliko se nama nešto činilo dugo i trajno, to je kod Allah tek jedan tren.

SURA 86

Mekka - 17 ajeta

Danica - **Tarik**

Sa imenom Allaha, Svemilosnog, Milostivog!

Tako mi neba i Danice! (Sura Tarik, 1.)

A znaš li ti šta je Danica? (Sura Tarik, 2.)

Zvijezda blistava! (Sura Tarik, 3.)

Nema čovjeka nad kojim neko ne bdije. (Sura Tarik, 4.)

Nek čovjek pogleda od čega je stvoren! (Sura Tarik, 5.)

Stvoren je od tekućine koja se izbacila, (Sura Tarik, 6.)

koja između kičme i grudi izlazi, (Sura Tarik, 7.)

i On je, zaista, kadar da ga ponovo stvori (Sura Tarik, 8.)

onoga Dana kada budu ispitivane savjesti, (Sura Tarik, 9.)

kada čovjek ni snage ni branioca neće imati. (Sura Tarik, 10.)

سورة الطارق - سورة 86

بِسْمِ اللَّهِ الرَّحْمَنِ الرَّحِيمِ

1. وَالسَّمَاءِ وَالطَّارِقِ

2. وَمَا أَدْرَاكَ مَا الطَّارِقُ

3. النُّجْمِ الثَّاقِبِ

4. إِنَّ كُلَّ نَفْسٍ لَّمَّا عَلَيْهَا

حَافِظٌ

5. فَلْيَنْظُرِ الْإِنْسَانُ مِمَّ

خُلِقَ

6. خُلِقَ مِنْ مَّاءٍ دَافِقٍ

7. يُخْرِجُ مِنْ بَيْنِ الصُّلْبِ

وَالْتَرَائِبِ

8. إِنَّهُ عَلَى رَجْعِهِ لَقَادِرٌ

I tako mi neba puna kiše (Sura Tarik, 11.)
i Zemlje koja se otvara kada rastinje nikne,
(Sura Tarik, 12.)
Kur'an je, doista, govor koji rastavlja
istinu od neistine, (Sura Tarik, 13.)
lakrdija nikakva on nije! (Sura Tarik, 14.)
Oni se služe spletkama, (Sura Tarik, 15.)
a Ja ih uništavam - (Sura Tarik, 16.)
zato nevjernicima još vremena dadni, još
koji trenutak ih ostavi. (Sura Tarik, 17.)

9. يَوْمَ تَبْلَى السَّرَائِرُ
10. فَمَا لَهُ مِنْ قُوَّةٍ وَلَا نَاصِرٍ
11. وَالسَّمَاءِ ذَاتِ الرَّجْعِ
12. وَالْأَرْضِ ذَاتِ الصَّدْعِ
13. إِنَّهُ لَقَوْلُ فَصْلٍ
14. وَمَا هُوَ بِالْهَزْلِ
15. إِنَّهُمْ يَكِيدُونَ كَيْدًا
16. وَأَكِيدُ كَيْدًا
17. فَمَهْلُ الْكَافِرِينَ أَمَهُمْ
رُويَدًا